



Kamis, 6 April 2023
Ogen: Hosea 14:1-3



Alemlah Dosa Kami



Manusia singgeluh ngikutken sura-sura pusuhna, ndarami penampat si banci mpesenangken ukurna, janah megati lanai mpertimbangken sura-sura Dibata. E maka bagi atena jadi, bagi meriah akapna, e me sinisurakenna. Kedungenna, kesimpulen geluh manusia e me, erdosa. Sanga ikuasai dosa geluhna, kiniseran, kinisuin si jadi. E maka pedah nabi, pedah guru, pedah kata Dibata jadi pengapul man bana. Dikune surut ia i bas dosa, keselamatan baginna, dikune lahang mate i bas dosa me ia.

Bage me Hosea ngidah geluh bangsa Israel. Dosa si ibahanna la saja mahan ia tertuktuk tapi njongkang. E maka iembarina bangsa e gelah lanai nggeluh i bas dosa, tapi mulih ku Tuhan sabap nai pe erDibata nge ia. Iajuk Hosea bangsa enda ertoto mindo pengalemi dosa man Dibata. Ngaku maka labo lit gegeh ras penampat si lebih gegehen asangken Dibata. Adi sedekah enda ia ngarap man Assur, labo ngasup Assur nampati ia. Kuda perang si hebat, megegeh labo banci iandalkenna. Sabap kerina e i bas kuasa Dibata. Gana-gana si isembahna labo ngasup kemuit, kuga ka ia banci nampati geluh bangsa enda. Kesadaren si bagenda me perlu kal ipeturah i bas pusuh bangsa enda. Kenca e, alokenna me perkuah ate Dibata. Sanga la ia ernalem ku ja pa pe, Dibata ngenca inganna ersembah, Dibata ngenca si ipujina. I je me kemalemen ate ialokenna.

Bage me kegeluhen bangsa enda, mindo pengalemi dosa, sabab Dibata ngenca ngasup merekenca, i bas Ia ngenca lit pengalemi e. Mari sidahi Tuhan, ninta `alemilah dosa kami' kenca e ulanai si ulihi, sabap labo lit simehulina adi nggeluh i bas dosa. Sirangilah, rimbanglah rassa. Gelah kita erteman ras Dibata. Sabab labo banci kita erteman ras dosa janah bersahabat ras Dibata.